

Siunnersuut uunga: Utoqqalinersiaqarneq pillugu Inatsisartut inatsisaat nr. xx, xx.xx-imeersoq

(Ilaqutariinnermut, Naligiissitaanermut Isumaginninnermullu Naalakkersuisunut ilaasortaq)

Saqqummiussissut

(Ilaqutariinnermut, Naligiissitaanermut Isumaginninnermullu Naalakkersuisunut ilaasortaq)

Siullermeerneqarnera

Utoqqalinersiaqarneq pillugu Inatsisartut inatsisissaattut siunnersuut matumuuna Naalakkersuisut saqqummiutissavaat.

Inuiaqatigiinni utoqqalisut amerliartorput, siunissamilu paaqutarinninnermut isumassuinnermullu aningaasartuutit qaffattussaapput. Taamaattumik pingaaruteqarpoq aaqiissuusseqqinneq aningaasatigut isumaginninnikkullu atasinnaassasoq.

Innuttaaqataasut amerliartortut inuunerminni sivisuumik sulisimallutik inuiaqatigiit ullumikkut iluseqarneranut ilapittuuteqarsimasut pitsaaneruumik atugaqartinneqarnissaasa qulakkeerneqarnissaat inatsisissatut siunnersuutip siunertaraa. Kissaataavoq utoqqalinissamut katersisarnerup kajungernerulersinnissaa, aammalu utoqqalinersiallit pisinnaasut perusuttullu suliffeqaannarnissaannik kajuminnerulersitsinissaq.

Taakkua saniatigut kissaataavoq utoqqalinersiaqartup isertitai atuuttut naapertorerullugit utoqqalinersiat aningaasartaasa naatsorsorneqartarneranni tunngavigineqartartut nutarteriffigineqarnissaat. Ullumikkut utoqqalinersiat naatsorsorneqartarput isertitatigut paasissutissat ilaatigut nutaanngilisimasut tunngavigalugit. Naalakkersuisut kissaatigaat isumaginninnikkut ikiorsiissutit isertitanik paasissutissanik nutarterneqarsimasunik tunulequtaqartumik ikiorsiissutaasassasut.

Isumaginninnikkut akisussaassuseqarneq Naalakkersuisut pingaartittorujussuuat. Taamaattumik naalakkersuisooqatigiinnermi isumaqatigiisummi allassimavoq aaqiissuusseqqinnerit eqqunneqassasut inuuniarnermi atukkat pitsaanerulernissaat qulakkeerniarlugu. Utoqqarnut politikkeqarneq oqimaaqatigiinnermik, ataqqinassusermik pitsaassuseqarnermillu aallaaveqassaaq. Nunatsinni utoqqalisarneq iluarusunnartuussaaq.

Utoqqartatta isumagilluarneqarnissaat Naalakkersuisut pingaartippaat. Inatsisissatut siunnersuutikkut utoqqalinersiaqartoq angerlarsimaffimminiiginnarnissaanut angerlarsimaffimmi ikiorteqarneq pisariaqartinneqarpat angerlarsimaffimmi ikiorteqarneq akeqanngitsoq eqqunneqassaaq. Taamaaliornikkut utoqqalisut sungiusimasaminni toqqissinartumik qularnaatsumillu sinaakkuteqartumik namminneq angerlarsimaffimminiiginnarsinnaanerat qulakkeerneqassaaq.

Ilaatigut sivisunerusumik suliinnarsinnaanerup kajungernerulererneranik, isumaginninnikkut ikiorsiissutinik pisariaqartitsisunut tunniussisoqartarnissaanut qulakkeerinnittumik, peqatigitillugulu innutaaqatitta utoqqalisut namminneq angerlarsimaffimminniiginnarnissaannut pitsaanagerusumik atugassaqaarnissaannik qulakkeerinnittumik Naalackersuisut inatsisissatut siunnersuummik saqqummiussaqaarsinnaagamik nuannaarutigisorujussuaat,

Taamatut oqaaseqarlunga oqaluuserisassaq Inatsisartunut tunniuppara.